

四庫全書

史部

欽定四庫全書

明名臣琬琰錄卷四

明 徐紘 撰

長興侯耿炳文追封三代神道碑銘

并序

劉三吾

皇上有天下以來玉音日所敷訓文武臣庶惟忠與孝
是勵是懋念爾數四開國勛舊相從濟江翼載興運宣
忠効勞亦有年矣今朔南一軌天下大定而賞賚郵典

稽至於今勅賜緡人五萬定與造第鳳陽亦既告成
行且就第則載賜鈔二十錠與葺先塋表儀其墓念爾
子爾孫克有今日皆由祖宗樹德其前乃追贈其先金
四錠白金四十錠鈔一千錠文段表裏三十疋安富殿
家榮享有廟神道有碑脩物肖像有翁仲羊馬於是賜
號長興侯耿炳文既得賜第其家以爵就第其鄉三代
考妣子孫侯者其高曾祖考亦侯子孫所妣者侯夫人
高曾祖考妣亦侯夫人陰陽表裏忠厚之道炳文惟念

不肖之身奮自農畝獲際皇上不世之遇貴至封侯富
迨子孫皆非始願所及也某愚且蠢不知所以顯揚其
先皇上不惟教以顯揚之道又與顯揚之資又三年為
洪武二十七年乃狀其事於翰林儒臣劉三吾按狀炳
文世鳳陽邑人奮身農畝當元至正壬辰所在虹亂鄉
邑尤甚老父君用四顧徬徨無所於歸父子二人因念
與其伏山林义手就戮曷若相率舉義兵得豪傑而往
輔之乃挺身謁今上於鳳陽一見被蒙知遇自至麾下

日脩使令授先父管軍百夫甲午年四月領軍隨上取
滁州六月取城口張營寨取嘉山繆把頭營寨再取滁
州守禦軍千戶乙未閏正月從上領軍取和州守禦授
明威將軍管軍總管六月隨龍濟江取太平守禦丙申
二月從上克采石中丞曼濟水寨取額森繼取臺城守
禦聚寶門悉父子相從領軍是月十七日同父領軍隨
總兵徐達今開國公取鎮江守禦其夏四月先父奉命
統兵應拔常之宜興地界張氏勢所必爭則日相暹暉

各柵木自營盡死以報稍失尺寸即全軍而死是故人
百其勇有死無二是役也先父賈勇先登用獲螳附騰
柵而上見斫傷以死猶力戰不休父既死炳文襲職
仍管其軍六月取廣德守禦丁酉取長興守禦開設長
興翼元帥府署授總軍元帥甲辰改元帥府為興武衛
親軍指揮使司就職本衛指揮使丙午調隨徐總兵取
湖州其年取蘇州吳元年九月回京授大都督府僉事
明年正月上即皇帝位改元洪武其年授鎮國上將軍

兼太子右卒副使其年九月隨總兵常國公征大同守
禦回至太原二月以其軍隨總兵徐國公征陝西時
兩軍人馬甚盛方事仇殺夾武功東川兩陣思齊在其
東思道壘西日數挑戰葺食以俟曾不少懈衣甲虬蝨
生身而瘡不恤也如是者數月餘兩軍相敵無少休暇大
概彼稍隙我即進以是堅固力不克支相與遁去既得
其地就鎮守之開設行大都府陝西等處行中書省署
事久之三年開秦府授府左相之職其相秦也直言正

色多所匡正其年十一月受今封爵為侯自壬辰至丙申五年悉從父領軍自其父沒於王事後即以其軍攻城畧地得廣德得長興而侯所爵兆於此矣繼得湖州蘇州懷慶澤潞平陽太原陝西為侯所兼官亦兆於是矣前後從軍二十有七年中間多其父子之兵與其所自得之兵最苦戰者長興之役當姑蘇鳴張之日其所必戰血戰之地而湖蘇兩大郡尤其表裏山河之勢當其有事於東吳也諸將會議上前無不先請往擣其所穴抑亦平探囊中之物耳皇上首策萬全乃首在雲川大都彼折兵以禦我其力分

算之高非凡所能及也由是決計先湖後蘇彼雖連營相望而湖蘇之勢兩分彼有手足不相應之患我師無腹背受敵之虞則侯等所為酬戰能為國全是東吳者實皇上發縱指示伏逐虎兔之勢耳是功也徇之功也其敢以自名今故為三吾言之也然則侯前後所歷戰百戰百捷其功大矣侯雖不敢自名其功而功之在侯猶獵之不能忘犬犬之不能忘所自也如此其克有今也宜哉三吾聞其言念昔建武之中興也況奔兩耿實以文子同據忠

赤盡率國家故能聲援相應共成犄角之勢以恢復舊物光照
先業炳文父子固不敢上方況弇其心之忠即二耿之忠也而
侯一不自口其能天之生斯人為我皇上成是混一之功致此
太平之治也豈偶然哉為之銘曰天生聖皇龍興鳳陽有志其
人誠主之真率相來迎如漢沛豐蕭曹景從風虎雲龍耿侯長
興父子領兵從上討征父況子弇力敵是戡每戰必酣長興之
役父也戰死子也世襲李張在陝西兵據險卒也俱剪長興受
封悉以是功孰克比隆秦相兼官舉由其賢入其泥凡父死王

事朝有贈諡公為果毅子既封侯三代亦侯富貴是優金匱石
室山河帶礪子孫世世子孫世世輔我皇家億千萬禩

宋國公馮勝追封三代神道碑銘

并序

劉三吾

嘗讀小雅詩天保序有曰君能下下以成其政臣能歸
美以報其上然後知君推恩以待臣下臣子當感受及
其親之恩以報君上君親之恩天地之造不容名言臣
子報上罔極之恩詎言語所能形容其萬一哉當元政
不綱宇內幅裂羣雄蠡起皇上以神武之資濟難逃之

運時則有若熊羆之士不二心之臣疏附先後折衝禦侮於是馮勝兄弟夤緣會遇為時爪牙從龍濟江獲展尺寸以有今日非偶然也洪武二十二年詔公侯各還其賜之緡鏹與各造第舍繼賚金帛安富厥家追封三代用生者爵墓之享堂則脩物肖像礱石樹碑悉出內帑與為之以三吾職在翰林式司紀載懇文其事公之先泗州幕山人有遠祖失其名諱再移家光州固始近代里中有老卒見馮家祖先書始祖征西將軍異者傳

為征西將軍異之後曾太考諱元善家世業農以曾孫
貴勛階爵贈如其曾孫妣史氏國公夫人祖考諱信贈
如其孫妣朱氏國公夫人再徙今鳳陽定遠之地家焉
考諱文質贈其如子隱德不仕妣汪氏國公夫人生三
子公其季也公名勝賦性謹厚有智而勇當兵興時念
不能坐受魚肉甲午之歲同兄國用伏謁今上於妙山
從克滁州三义和河州收門寨度江克采石太平等處
陳額森來犯和州人馬三倍我師以廟算制勝獲其全

軍額森白死不得則願款附刑牲與盟飲血而嘔知其
懷貳必不令終矣其軍之投戈也環上而寢悉其兵士
唯公一人侍側竟達曙無他是後公先陷陣衆乘勢崩
之遂擒額森丙申二月從破臺中丞曼濟哈雅水寨於
采石三月進攻臺城拔之還軍從擊鎮江丹塗寧國授
萬戶丁酉克甘露松山望亭戍克秦宜興遂授元帥
守禦庚子國用卒由親軍指揮封郢國公公襲其職仍
掌親兵偽漢陳友諒悉衆來寇公衝其中堅敗之於龍

灣繼復采石太平壬寅克安慶江州陞都護癸卯應拔
江豐陞同僉調擊廬州甲辰從拔武昌得廬州己巳克
泰州海安壩及江西諸郡丙午淮安豐浙西舊館蘇
州悉從諸總戎下之吳元年丁未陞銀青榮祿大夫都
督府右都督是年克山東諸郡戊申春正月上即帝位
國號大明改元洪武其年十月授副將軍克開封淮南
潼關懷慶太原澤潞等處悉平之二年授征西將軍克
陝西鳳翔等處諸郡進兵追元大帥李思齊於臨洮降

其全軍河州等處以次俱下三軍大敗元總兵庫庫特
穆爾於定西回京封今爵宋國公守鎮陝西四年分兵
三道北征公以征西將由西道取甘肅等處敗元帥失
刺兵敗多喇口入於哈勒琿口獲人馬數十萬羊馬駝
稱是進拔肅州等處至額齊訥敗俞實兵五年回軍六
年七年練兵臨清北平繼往大同八年自大同征元末
布色博囉等地回鎮陝西十一年回軍十二年至十七
年連鎮河南撫軍恤民民兵欣附頻年以久鎮於外為

勞上乃召還遣禮曹齋羊酒慰勞之其年秋授征北大將軍總兵北征屯兵絳橋操練兩月而還二十年佩征北印總步騎三十萬城大寧等處北征元邊將納克楚受其學士額森及全國公觀通平章吹丹降款所部悉降驅之入山海各城屯住二十一年往東昌等處調各城達勒達軍隨潁國公傅友真征雲南兵至常德四川等處叛其後繼往永寧鎮守沿邊撫安諸軍二十三年秋蒙恩賜第追封之典制詞所謂爾勝居京師除肘掖

之患歷征戰建爪牙之勛平定中原宣力內外佐成混
一是勛也發蹤示指之力也朝廷既待之隆而報之厚
矣而公則曷敢以此自名哉嗚呼一門兄弟兩封公爵
郢公不壽公也克壽是使兄所齋志不能以卒報者而
公所著微勞不惟不克報乃因之益以顯揚其先郢也
宋也幽明之感為何如哉遂申之以歌歌曰真人為時
作民主兮揭日月於中天爪牙從龍亦奮起兮際風雲
於八埏郢公去宋公繼兮式克振後而光前稟廟謨而

廓疆宇兮爵彌進而志彌堅其賜之第賚以金帛兮既
安富其家聲需厥澤滲及漏泉兮又尊榮其先親以愚
臣不知所以顯揚兮復俾勒文乎堅珉祖孫相望感洪
造兮矢銜結而無其因則願世篤忠貞兮等帶礪乎萬
億之春

陸安侯許國襄簡王公神道碑銘

有序

劉三吾

許國襄簡公既葬有年洪武之二十年冬十有一月己

亥皇帝御奉天門以工部奏公墓隧之石已具勅翰林
學士院為文賜其家俾鑱焉臣三吾職在紀述不敢控
詞則退而稽其世次官代行事之實序而銘之臣聞天
生聖上聰明時又當元政祗僻寓內幅裂羣雄角起資
以君主治其爭亂則有熊羆之士不二心之臣若徐常
兩王佐命討伐襄簡王公單秉義効順以會其成功大
一統之業者亦天所畀予者哉公姓王諱志世鳳陽臨
淮人性鷲猛有智謀臨陣對敵果毅無前至正壬辰三

月土寇蠱起舉鄉兵取濠州且守且戰甲午前克滁州
勢劇破竹知天命攸歸在今上疏附來從乙未濟江得
采石太平破中丞曼濟哈雅水寨進拔建康丙申七月
調隸總兵同僉樞院徐中山圍常州屢騰柵先登身犯
矢石功聞授懷遠大將軍右副元帥丁酉三月常始下
公功為最後恢復宣州江陰宜興高郵等州府多著戰
績中山悉其能公克攄其智勇故也辛丑秋九月侍上
親下安慶諸郡邑壬寅夏四月復隸中山身先馳戰江

西諸州縣望風崩角癸卯八月乘海艘從御舟躡陳友諒於彭蠡友諒中流矢死擊走其餘黨於注口之水寨甲辰三月上親征湖廣武昌公暨諸將壹稟承睿算與賊還囑遂下之載從中山復廬州拔安豐逐北姑蘇張士誠軍陞飛熊衛親軍都指揮使總兵守禦陸安州明年春改按陸安衛指揮使戰守戢綏敵讐民附戊申春正月上正宸極國號大明改元洪武其夏五月奉旨將本衛兵征迤北次汴梁尋調征河南冬十月從馮勝宋

國公渡河迤邐進取懷慶澤潞府等州往往所部直前
無堅陣是臘徙鎮平陽居三年移守漢中仍駐帥陝西
明年將其全軍深入察罕諾爾絕塞却敵遠遁還軍平
陽冬十一月勅贈開國輔運推誠宣力武臣榮祿大夫
柱國同知大都督府事封陸安侯五年從中山征漠朔
大獲敵而還九月又從傅友德今潁國公征雲南所向
克捷十七年凱還京師十九年八月十七日以疾薨於
第上為之震悼罷朝賻贈有加追封許國謚襄簡公生

元統乙亥正月九日春秋五十有二以薨之十月二日
勅葬鍾山之陰曾祖考四一公鎮國將軍僉大都督府
事護軍追封羅山縣子妣董氏追封羅山縣子夫人祖
考五一公驃騎將軍親軍指揮使護軍追封太原伯妣
寧氏追封太原伯夫人考六三公榮祿大夫同侯妣潘
氏追封陸安侯夫人室潘氏從封許國夫人先公薨生
至順壬申五月十九日卒洪武闕 三月始葬鳳陽臨
淮至是從公祔焉生男四人長威次域次璣次環女一

人適黔國公子景佑孫男三女二揆公功行是宜銘詞
曰先時寓內劬勦弗靖烝民有主資以戡定效用者將
鷹揚其人徐常兩王開國蓋臣各有牙爪奮其威武惟
襄簡公以佐徐府既定江淮亦拓中原自河徂陝益西
其轅繇淮而北極是朔漠轉征雲南卓著勇略最公在
軍沐雨櫛風惟知徇國逞卹厥躬陸安受封方倚大用
天不憖遺黃梁遽夢上為震悼卹典是頒許國襄簡爵
諡具完鍾山之陰公所藏室壽正名垂煜然竹帛有桓

其表有穹其碑千秋萬禩永永無期

東川侯胡公墓志

劉三吾

勅賜開國輔運推誠宣力武臣榮祿大夫柱國僉大都督府事東川侯臣胡海世鳳陽定遠縣毛城村人當元之季羣雄角起侯念不能叉手就戮始從亦豪舉義知非其人去之隨大軍拔鳳陽敗元將賈魯兵為千夫甲午復泗州滁州為萬戶乙未春復和州夏六月從龍濟江得采石太平溧水溧陽還太平戰敗陳頌森於北

門丙申春次克臺中丞曼濟哈雅水寨既破額森營於南臺先登城之東北隅臺軍潰馬進克鎮江援廣德擊宣州拔常州取寧國敗謝璽元帥兵遂得宣州選帳前先鋒畧江陰踣湖州西南直抵天門寨鋒宜興啟婺州麋諸暨紹興衎偽漢於龍江仍得太平復潛山擊安慶攻江州得湖廣沌口得江西南昌得城山羅家寨悉與有功其隸魏國公有事於荆常澧衡潭叙寶慶手俘元將唐隆就守禦其地受上吳王令旨陞寶慶衛指揮使

增陴浚隍兵民欣附以其力餘載葺益陽城壘留鎮焉
吳元年上即位之洪武元年以本衛兵聽調平章楊璟
進征湖南廣西自祁陽永州全水相以北諸縣郡或摧
或撫仁形義著既乘勝壓桂林之分省城壁峭倚郡縣
完備未易攻下侯駐兵東江首推萬戶皮彥高替通把
水張榮元帥者翻城內應夏六月二十三日四鼓大軍
於北門入角亭梯墉而上軍令所臨全城悉附議者謂
侯首其功直授大將軍仍寶慶指揮二年有旨授右副

總兵助勦江上思州獍首黃英傑等大勢泰山之壓鷓
卵也英傑等逃之士萬山七洞口尾追之去英傑陣死
英覽就俘斬餘撫安之三年春聽調江夏德周德興取
蜀然伏隘至險侯扼亢而咋之無不擊焉天門山亦負
固旅拒夜率敢死士緣崖而上賊無一得脫者四年春
抵賈厚漁陽關不避崖陁騰柵以入巢穴為一空功聞
授世襲指揮仍守益陽是年夏江陰侯調補武岡雲
飛山寨梟其反者數人得生口三百六十五新寧縣內

石鶴金竹萬數等寨亦梟其渠餘戶口或民或俘武岡
以寧是秋再以江陰調捕靖州之綏寧首得馬羊西兒
等寨次得大水上峒諸寨或奔之或械之綏寧以平五
年復以江陰調改沅岳徑三衛兵節次攻下五開潭溪
太平山穴關山皮林峒然塗山栗家峒曹滴如拘勝浪
林長保等乃中關峒或禽斬或撫諭靖之內舉安可戰
瘡痍中又六年始有除大都督擢錄朝家為不負侯矣
十四年秋大將軍潁川侯今潁國公總兵征雲南諸夷

侯與郭英都督今武定侯統兵率四川三萬之衆道永寧抵赤水為潁公聲援俾得致力於雲南功實相表裏焉明年春侯與武定討大理平建昌降其平章伊嚕特穆爾其甸澧州到大溪大容也度天關嶺擒獲蠻首夏三八古皮等既已獻馘次永順士卒未駐營悉出兵志修路俄蠻兵千餘薦嶺而下侯與其子玉即被甲上馬迎敵玉手射斃七人侯亦多所射殺蠻潰去會修路之兵亦回腹背擊之無一獲免者散毛之後尤多所俘馘

人謂侯得士死力致然十七年夏以平雲南功今爵食
祿千石子孫世襲金書鐵券載在盟府三十年春宋國
公馮勝總戎北征侯左叅將抵金山從大軍受元邊將
克楚出降時其部曲有中悔者侯身選囑之竟得納款
無他虞二十三年秋侯例受褒卹之典先錫鏹五萬錠
建第其鄉邑繼賚金帛俾安富追封三代侯爵且廟墓
次脩物肖像樹碑顯揚其先方期享福未艾而疽發於
背醫鏹鍛志在戰陣以死中使問病未復命薨矣六月

二十三日也輟朝遣祭卹典有加嗚呼侯當羣雄並起能擇真主而事之最其攻戰溪峒居多黔南朔潰功亦不可語將用老際風雲之會依日月之光迄於侯封三代子為駙馬孫食世祿侯雖死而猶生乎公生元之天歷己巳十月十日酉時壽六十有三曾祖考諱某妣某氏祖考諱某妣某氏考諱某妣某氏妻吳氏以侯貴受封子男八人長斌龍虎衛指揮使征雲南卒次玉次觀尚公主次寶次財次玳次和尚次行者孫男三人曰炳者

斌子食其父之祿孫女三人以九月某日葬所居一里許之鳳凰山方侯臨終謂諸室有從者否李氏恩賜者隨諾之即就死衆妾掬止之居一二日竟自縊矣其不食前言亦難矣諸孤駙馬等遣人致禮弊求誌其石因為備書侯所履歷以壽不朽云

越國公新廟碑代大史公作 方遜志

丈夫之遇於時也生使人懷之歿使人思之且建

廟食於其土必其德澤入人之深堅如金石而弗渝信如四時而弗爽昭如日星而不忒然後足以厭乎人心而合乎輿論也嗚呼豈易致哉若今之越國公者其庶幾無愧於此乎自辛卯兵興天下大亂民遭溺焚偃偃無所棲止皇帝提三尺劍起而救之屯兵滁陽公杖策謁轅門一見語合遂居前鋒以佐揚天威焉至乙未春三月王師取和州夏六月下太平丙申春三月平金陵攻京口丁酉

春三月又拔毘陵公皆在行中塞旗斬將或操螯
弧以先登前後屢建奇功乃授右翼統軍元帥使
衛帳下夏四月又從上破宣城上命行樞密判官
鄧愈成宣公副之秋七月遂同諸將攻徽州拔之
元將楊完者聚兵十萬欲復其城公自婺源兼程
以進橫槊而前大呼殺入衆皆披靡而遁戊戌春
三月諸將軍克嚴州公又偕行降溪洞兵三萬以功
遷行樞密院判官公謂蘭溪雲巖為甚通蘭溪下

則斷婺之右臂矣冬十月乃下蘭溪十有二月王師取婺州陞公僉書行樞密院事公益思有以自効己亥春正月攻下諸暨州十有一月又平處州庚子夏六月又拔信州信方絕糧人皆勸公還師公曰此閩楚喉衿地可棄之乎乃築城浚隍為堅守計辛丑夏五月上憫公之勞且以婺為海右大藩通閩引越非宿將重臣有以控制之不可乃授公江南等處行中書省參知政事屯兵於婺州壬

寅春二月溪洞兵叛而歸公遂遇害一時知公之死者莫不哀慟流涕如喪父母焉上聞之亦震悼弗置親御翰墨作文以祭之且命有司塑公像配享於卞忠貞公廟庭甲辰冬復降旨贈光祿大夫浙東等處行中書省平章政事柱國追封越國公先是公歿之明年公之諸部曲與境內之民皆悵然遐思若不能勝其情者乃相率即城中作新廟一區十閱月而廟成堂門亭廡咸具及是寵褒之

命下復羣謁於金華宋濂諸部曲進而言曰公之
號令素嚴人無違禁賞非無功罰非無罪使我等
攻必克戰必勝而不冒於寵靈之內者非公之賜
歟我之病也孰扶而起之我之凍且餒也孰察而
周之其能親自裹創注藥及安於食且衣者非公
之賜歟公之德我何以將之境内之民又進而言
曰吾婺之民周瘵殊甚公專心撫摩之昔也奔走乎
西東歲無寧居今也長幼一堂愉愉雍雍非公之賜

歟昔也商賈不通布穀不給今也市區充溢百貨具集
非公之賜歟昔也厄於暴強莫敢何問今也攘一莖茅
公亦使人償之如承平時非公之賜歟公之德我亦何
以將之今者寵光下被爵登上公人神洽熙雲日潤明
山川草木亦有喜氣適新廟告成願為我紀詳公之功
德以垂永於無窮是用合辭以請濂竊觀古之名將出
戍邊城者矣苟得甲士之歡心則耕田鑿井之氓必至
於弗寧使斯民稍得以遂其生則持戟荷戈者或不免

於愁嘆孰能有兩全者哉若公者可謂尤賢乎已公常自誦曰我不知書然吾行軍唯知有三事而已不殺人
不虜人婦女不焚毀人廬舍故其軍一出遠近之人皆爭附趨之蓋公處心以仁蒞事以威惟其仁也故不言而民附惟其威也故不待戒而兵自不敢犯昔際征討制御士心不越法度所在吏人不知有軍及其死也人為立祠享之較之於公其事固無大相遠也廟而祠之其誰曰不宜初公之未薨嘗夜出人見其兩目煜煜有

光若燈及其既薨敵人數擾我邊陲公降祥異或見夢
於人或觀靈光滿野洶洶聞人馬聲及出師輒大捷似
實有陰兵來助者是則公之陰魂靈出入於星辰之間
固未嘗亡也因并及之使知天之生公有非偶然者公
姓胡氏諱大海字通甫泗之虬縣人詩曰真主啟運四
方攸同升龍在天颺行雲從中有一人萬夫之雄其人
謂何時維越公其一凜凜越公勁氣橫驚手荷鐵父其祭
若路彼趨以為我捷以步陷陣如飛逢者必仆其二天兵

四出靡弗在行檜目疾眎前無堅城有聲泚泚敵人震

驚土疆既拓大勛以凝其三王曰俞哉爾予羽翼婺維雄

藩爾鎮其域爾叅政府解爾宥密爾勞爾俸以盡乃職

其四公既受命分間建牙威龍化孚莫敢或譁闕

汝掖汝摩化汝呻吟而為謳歌其五視彼郊原其耕澤澤

視汝闐闐其通繹繹視彼室廬其居奕奕何以致斯伊

公之力其六我民無祿俾公棄捐精神上游同合化權民

之云思其何舍旃非廟曷祀非祀曷虔其七乃簡甓材乃

端術經乃差穀辰視星之定林衡奔事班垂稟令紫稅

星錯素階玉瑩其邃清有寢嚴衛有門旁挾有廉四繚

有垣肖像中居威神騰軒陰風肅如髣髴若存其維公

顧綏時著靈響陰火東驚鐵錡西上赤幟一揮無敵不

礮孰不生畏孰不景仰其生為名臣死為明神策書可

列指可縷陳矧公之英貫為屈伸幽明有殊神人則勻

其一 公實惠我弗間弗二人之依公如旌擊楫登我稼

穡遏我妖沴歆我明祀欽於世世其十

明名臣琬琰錄卷四

欽定四庫全書

明名臣琬琰錄卷五

明 徐紘 撰

汪國襄烈吳公神道碑銘

吳伯宗

洪武十四年十一月二十六日開國輔運推誠宣力武
臣榮祿大夫柱國同知大都督府事江陰侯吳公以疾
薨於青州十二月訃聞皇上為之憫悼輟朝三日詔所
司定贈謚加贈特進光祿大夫上柱國中軍都督追封

汪國公謚曰襄烈遣使者迎柩以歸洪武十五年二月
丙子賜葬鍾山之陰上念其功不已命臣撰文勒諸豐
碑以垂不朽伯宗職居翰林屬當執筆謹叙而銘之公
諱良姓吳氏鳳陽定遠人初名國興後賜今名氣岸雄
偉性質剛直與弟楨俱以勇力稱元末羣雄并起海內
鼎沸皇上以聰明神武仗大義奮起布衣公兄弟委身
相從服勤左右上深器焉甲午秋從上取滁州乙未春
從克和陽常為先驅戰皆有功六月從渡大江與元兵

戰於采石拔其營乘勝克姑孰尋下溧水溧陽丙申從
定建康戰功為多又從今大將軍太傅魏國公徐公達
克鎮江下常州屢著功勤歷陞軍職丁酉下江陰命公
以指揮使領兵鎮守時偽吳張士誠據姑孰跨有淮東
浙右地大物衆兵食富強實江南一勍敵而江陰正當
東南要衝喉襟之地士誠又多變詐動以金帛啗誘將
士公行上諭之曰彼以其詐我以吾誠爾為邊將慎守
封疆約束士卒世外交毋納逋逃毋逐小利無與爭鋒

惟保境安民而已公奉命惟謹繕城池遠斥埃利器械
嚴部伍士卒無敢逃亡無敢出境生事者敵亦畏之不
敢侵犯數年上親將兵下江西克湖廣平偽漢陳友諒
大軍屢出而無東顧之憂以公之扞蔽也丁未克姑蘓
士誠面縛上以姑蘓承士誠割據之餘力戰乃服必得
剛毅有智畧者鎮之遂以命公公至奉宣皇上盛德紀
律嚴明號令整肅軍民輯睦咸得奠安洪武三年天下
大定論功行賞以公有守江陰之功封爵為江陰侯食

祿二千五百戶賜以鐵券子孫世襲恩至渥也廣西右
江諸州僻處炎徼去中國遠數千里前古號為要荒乍
臣乍叛唐宋已來羈縻而已元都北方相去益遠姑息
尤甚夷俗狃於仇殺數侵盜邊境五年春命公將兵討
之公率兵深入跋履崇山踐歷險阻剪薙荆棘衝冒瘴
霧勤勞特甚數月盡平其地俘獲不可勝計自是溪峒
夷獠畏威懷德革心回化輸租賦奉法令同內地焉先
是上稽古制建親王為槃石藩屏齊王受封青州命公

營建王府宮殿社稷公經營區畫部署軍卒並手偕作
功成民不知勞公留青州二載得疾而薨享年五十有
八公自起身行伍至為將帥受封爵終始一致有功無
過故其薨也上深惜之恩禮有加焉公存時以公貴推
恩三代曾祖三七府君贈鎮國將軍僉大都督府事護
軍追封潁上縣子妣周氏追封潁上縣子夫人祖十一
府君贈驃騎將軍都指揮使護軍追封延陵伯妣劉氏
追封延陵伯夫人考似龍府君贈榮祿大夫同知大都

督府事柱國追封渤海侯妣葉氏追封渤海侯夫人配
高氏封江陰侯夫人子男二人長曰高神策衛試指揮
使次曰壽安女三人在室公弟楨亦以勲封靖海侯追
封海國公先公三年薨嗚乎古今豪傑之士際風雲之
會攀龍附鳳竭忠勤樹勲烈以名世者多矣未有如公
兄弟同遇聖朝同立大勲同膺高爵輝映赫奕若斯之
盛者也是宜勒諸貞石以光前古傳後世而垂無窮豈
止照耀泉壤而已哉銘曰天啓洪運大明肇興豪傑率

從霧擁雲蒸桓桓吳公剛毅英烈異才間出萬人之傑
天戈義旗飛渡大江爭先鼓勇敵莫敢當既定金陵亦
下京口公俱在行厥績多有江陰崇墉東南要衝屹若
底柱維公之功姑蘓新附命公綏靖紀律嚴明大小從
命炎荒僻遠命公徂征歷代羈縻慕義來庭功成汗馬
名載竹帛兄弟二人並著開國河山賜誓列侯疏封慶
延後嗣與國無窮生榮死哀富貴終始進爵上公錫謚
具美鍾山之陰有碑穹然勒銘紀功何千萬年

海國襄毅吳公神道碑銘

劉崧

洪武十一年戊午前征南副將軍靖海侯吳楨奉詔出
定遼是秋以疾聞上遣醫馳驛視之弗能愈遂輿疾還
京車駕幸其第問勞有加明年己未五月疾革以其月
二十六日薨訃聞上為之震悼輟朝二日詔贈特進光
祿大夫左柱國追封海國公謚襄毅仍賜寔鍾山之陰
俾官給其事葬之日車駕臨奠加贈賻焉又明年庚申
上追念其勞爰敕儒臣禮部侍郎臣崧撰文刻諸神道

之碑以昭不朽臣崧奉詔不敢辭乃追考公牘紀載第
而書之謹按公初名國寶後賜名楨字幹臣姓吳氏世
為濠之定遠人自少時已卓犖有膽畧及天下大亂從
上起兵里中即能知天命有在與兄江陰侯良俱隸麾下
下悉心委事焉自歲甲午乙未西克滁和東渡大江揚
威振銳所向無敵由帳前都先鋒為總管陞建興翼院
轉判分院元帥尋為天興右翼副元帥與良同守江陰
每寇至輒擊走之首破偽吳張士誠水寨擒其梟將朱

錠甲辰授英武衛指揮使丙午寇出為馱沙上親督戰
追至巫子門寇乘潮逆拒首尾相失公縱兵急擊之俘
獲無算是秋從大將軍魏國公徐達率馬步舟師由港
口取湖州公勒竒兵出舊館振之戰以大捷事平遂留
戍焉吳元年丁未九月復從大將軍攻圍蘓州連破胥
葑二門士誠就執公奉令撫循秋毫無所擾進僉大都
督府事時方谷珍推明州未下上以公為征南將軍從
御史大夫信國公湯和徃平之公引兵乘潮夜入曹娥

江夷壩通道出其不意直抵車厰會降者言方氏已潛挈家之海公領兵追於盤嶼與合戰自申至夜三鼓敗之盡獲其戰船人馬輜重而還未幾谷珍降有旨由海洋進取福州不數日奄至城下圍其西南水部三門一鼓克之時偽平章陳友定據延平作亂明年洪武元年戊申進破延平擒陳友定閩平公歸次昌國會海寇葉陳二姓聚劫蘭秀山公調兵立勦之三年庚戌朝廷定功行賞進開國輔運推誠宣力武臣榮祿大夫柱國吳

相府左相靖海侯食祿一千五百石賜以鐵券使子孫世襲焉五年壬子詔大發兵東戍定遼命分總舟師數萬由登州轉運以餉之海道險遠人用艱虞公調度有方兵食充羨折衝風濤如履如達尋召還七年甲寅海上警聞公復領沿海各衛兵出捕至琉球大洋獲倭寇人船若干俘於京上益嘉賴之常往來海道總理軍務至是歸自遼東而疾作不起矣公生以天歷戊辰六月二十一日葬以薨之閏月十三日享年五十有二曾祖

三七府君贈鎮國將軍僉大督都府事護軍追封潁上
縣子妣周氏追封潁上縣子夫人祖十一府君贈驃騎
將軍都指揮使護軍追封延陵伯妣劉氏追封延陵伯
夫人考似龍府君贈榮祿大夫同知大都督府事柱國
追封渤海侯妣葉氏追封渤海侯夫人配李氏封靖海
侯夫人子男五人長堅西安護衛鎮撫側室陶出也次
忠林羽左衛鎮撫夫人李出也次端次洪皆庶出女五
人其第五女許為湘王妃尚在室惟公以驍勇之才際

興王之會鍾英淮甸立勲遼海致位公爵而不矜不伐
盡瘁所事真古之名將哉是宜銘銘曰赫赫景命大明
當天帝業所基公侯出焉桓桓吳公有仇其勇顧瞻在
廷玉立山聳元政不綱帝憫下民爰揮天戈掃除妖氛
始克滌和旋拔采石飛渡大江曾不終日公時在行兄
弟齊一莫不率從干城是力帝命汝楨言守江陰鄰敵
授首遠人歸心南牧丹陽東畧無錫建興策功英武躋
職寇窺海口縱兵擊之風從潮生彼逆不支從攻吳興

機畧周布捷出舊館振其歸路進拔葑門東定姑蘇擒
厥渠魁獻於京都帝念爾勞陞秩督府不曰四明亦肆
違拒造厲戈甲往貳征南挾潮而飛颺旗電帆撻金伐
鼓壁其城下寇窮而通膽落萬馬躡景追風執訊凱還
鯨奔鯢伏海霧雲鮮張方告平閩海方急千艘南馳殲
彼勍敵三山既隳延平遂通麾旄所指列郡來同公歸
自南蘭秀連梗鋤而闢之海道晒晒帝曰靖海實汝之
功茲命汝侯往承其恭煌煌鐵券翼翼命秩思延子孫

功翼王室載授征北督餉定遼白粲連雲颶風不搖倭
童跋扈出沒大洋爰獸獮之皇威以張茫茫遼海烈烈
英勇武弘將畧茂對天寵方召元老曹周世庸氣應德
符千載一逢維天佑賢公宜永福何疾之嬰遽此不淑
儀曹考行贈謚有光鍾山佳城天設地藏神道之左有
石嶷嶷儒臣作銘昭示無極

滕國襄靖顧公神道碑

劉崧

自昔國家興王之地必有才武雄傑之士出於其間以

贊立大功佐成大業為國虎臣享有祿位豈非天人交會之應哉故征西左副將軍濟寧侯顧公名時字時舉世為臨淮人曾祖十四府君以公貴贈鎮國將軍僉大都督府事護軍追封睢寧縣子妣王氏封睢寧縣子夫人祖文俊累贈驃騎將軍都指揮使護軍追封武陵伯妣林氏封武陵伯夫人考道祥累贈榮祿大夫同知大都督府事柱國封濟寧侯妣雷氏繼潘氏俱封濟寧侯夫人公志氣倜儻勇於有為元末政隳海內大亂皇上

龍興淮甸思濟天下公以同里率先來附被堅執銳常侍左右自歲甲午起兵西拔和州東渡大江凡擊叛討逆開疆拓境靡不率從始由百夫長轉元帥尋同知天策衛親軍指揮使司事繼調濠梁衛丙午詔與東平侯韓政取濠州破四門月城拔之洪武元年戊申從大將軍魏國公徐達北定燕薊拜驃騎上將軍副大督都府事兼同知太子率府事三年庚戌論功行賞進號開國輔運推誠宣力武臣階榮祿大夫勲柱國職同知大都

督府事爵寧濟侯食祿一千五百石賜以鐵券使子孫世襲焉明年辛亥授征西左副將軍由興元取四川入階州擒其梟將王進克文州綿州擊向家營寨破之又克漢州進圍成都偽夏丞相戴壽等望風款附北師入重慶其主明昇出降四川平五年壬子仍左副將軍從征北前將軍曹國公李文忠等分道入沙漠與大將期失道糧且盡士卒不能戰公奮引麾下數百人躍馬大呼衝薄部落戰敗走之遂掠其輜重羊馬而還軍勢復

大振七年甲寅從魏國公總各衛兵出鎮北平益築堡障練士伍繕甲兵廣牧畜雖邊隅日靖晝夜從幙府吏深計遠筭常若敵至明年乙卯詔還尋有旨從魏國公仍出北平十二年己未秋遽遘奇疾藥弗能愈以是年冬十一月二十一日薨享年四十有六訃聞上為之震悼輟朝二日明年庚申春二月己卯公喪歸自北平舟行數千里迎祭填道觀者感嘆敕賜葬鐘山之陰上親為舉奠復定誌文以賜之明日詔贈特進光祿大夫左

柱國追封滕國公謚襄靖其始終榮寵可謂異數矣配李氏封濟寧侯夫人今封滕國公夫人子男四人長曰敬金吾前衛後千戶所鎮撫次曰英曰華曰苟爾女二人既葬其孤敬泣而請於朝曰惟先臣事上二十餘年不幸蚤終顧神道之石銘文未勒敢援故事以請於以見聖朝眷待之厚且以慰先臣於地下也於是禮曹以為言詔可其請命禮部侍郎臣崧為之銘臣崧職在討論不敢以蕪陋辭謹狀次而書之且系以銘曰聖人受

命萬物咸覩乘時佐運各奮其武矯矯靖襄生於帝鄉
帝猶龍飛雲從之翔自淮渡江首定建業公時左右執
俘獻捷領兵東向遂夷月城電擊颺馳濠梁以清北叔
燕薊旋拜驃騎崇勲豐祿券鐵以誓乃命西討進自漢
中取道階文山巉水淥進圍成都作氣一鼓千夫投戈
殄厥孱主既從征北北度陰山擁槩奮呼出其險巖薄
衝部落免脫鷲擊掠其牛馬還給軍食主將上功帝憫
爾勞四方既平汝弓其橐橐弓戢戈北守燕薊嚴其扃

鐫式謹邊事灤水茫茫居庸閑閑馬絕南牧城無畫關
公歸未期遽以訃告沿邊驚呼當宁嗟悼襄靖有謚滕
國有封茅土新䟽沛豐舊庸闡績著銘爰勒神道榮光
自天天子有詔

營國威襄郭公神道碑銘

楊 榮

洪惟太祖高皇帝龍飛淮甸應天順人芟刈羣雄戡定
海內一時智勇材力之臣感會風雲效其忠勤輔成帝
業開千萬載太平之運竒勲偉績鏗鉤振耀勒銘鼎彝

垂光竹帛與國家相為無窮猗歟盛哉予嘗叨職國史
竊觀開國勲臣其間能身躋壽考世為貴戚子孫享有
顯爵久而益盛者不數人豈非其存心之仁與積累之
厚有間耶若營國威襄公蓋足徵焉公姓郭氏諱英臨
淮人生有異徵沈毅多智身長七尺膂力過人尤精騎
射年十八從太祖起義兵甚見親信每令直宿帳中取
徐泗滌和采石太平建康鎮常寧國諸郡屢立奇功上
嘗以郭四呼之上親征偽漢陳友諒大戰鄱陽湖相持

連晝夜公時金瘡未瘳力疾鏖戰賊敗於禁江口已而友諒中流矢死有言公之功者上問之公曰天威神筭臣何力焉上益重之時友諒子理復立於武昌進軍攻之其將陳僉同驍捷善槊馳入中軍帳下上方據胡床遽呼公曰郭四為吾殺賊公持鎗躍馬奮臂一呼賊應手殞墜上解所禦赤戰袍衣之曰唐之尉遲敬德不汝過也授驍騎衛管馬軍千戶從征襄陽克淮安濠州安豐陞宣武將軍驍騎左衛指揮僉事洪武元年戊申從

大將軍徐公北定中原下齊魯克汴梁平河南敗元都
破潼關彰德廣平所至有功初大將軍遣公取通州公
距城三十里為營深溝高壘為持久計衆請速攻之公
曰吾師遠來敵以逸待勞攻城非我利也宜出其不意
破之翌日大霧公以千人伏道傍率精騎三千直抵城
下元將烏寶巴國公帥敢死士萬餘張兩掖而出與戰
良久公佯敗彼乘勝來追伏兵中起截其軍為兩道斬
首數千級擒元宗室博羅梁王遂克通州元君乃北遁

克永平真定生擒守將湯同僉復從平章常公取太原
守將王巴拜軍於城西公憑高望之謂常公曰彼兵多
而不整營大而無備請夜劫之常公深然其計遣五十
騎伏城東十里以舉火鳴砲為期至夜公率十餘騎潛
入其營舉火鳴砲伏兵亦舉火鳴砲常公引兵繼至鼓
譟之聲相接巴拜軍大潰自屠戮乃棄城遁下興州大
同至沙淨州生擒偽將竹平章度可取鹿臺西安鳳翔
鞏昌追敗賊將賀宗哲於亂山庚戌陞本衛指揮副使

從征迤西克定西討西夏察罕諾爾撫安呼察平章沙
淨州復叛討平之克登寧州斬首二千級獲牛馬數千
陞昭勇將軍本衛指揮使賜金龍衣一襲辛亥陞驃騎
將軍河南都指揮使將赴鎮皇寧妃公之女弟也上遣
至公第餞之且謂公素靖儉賜白金二十罌廐馬二十
二匹時河洛新罹兵燹邑井蕭條居民艱食盜賊充斥
公宣布威德綏輯流亡申寬條明賞罰遠邇來歸者日
以千計未期年戶口倍增境內大治丙辰移鎮北平河

南士女不忍其去遮公馬數十里不得行甚至泣下既去為立生祠北平初定居民反側不寧公開示誠款諭以理亂禍福人心遂安元左丞何允中等聞公之德來降者凡九千餘人上遣使勞以上尊羊馬授龍虎將軍北平都指揮使賜誥命逾四年召還京進大都督府僉事灰山賊反承命討平之賜馬七匹辛酉從潁川侯傅公征雲南既至命公及都督陳桓胡海分道進討道多險隘諸將欲深入公曰破敵貴先聲攻取必自近始舍

近趨遠豈策之上耶遂先攻赤水河路距河二十里為營時久雨河水暴漲公曰賊恃水漲不意吾濟下令諸軍斫木造筏夜半濟河北曉賊始覺遂大潰生擒烏撒并阿容諸蠻由是雲南諸賊破膽進攻曲靖六梁州關索嶺及偽石元帥山寨皆克之至江川猗子寨寨依山公先遣騎兵五千攻其前賊空寨迎戰復以精騎數百搏其後斬門而入火砲連發烈焰漲天賊乃亂悉破滅之進攻大理金齒降其偽官段平章攻安寧州賊將布哈特

穆爾棄城走破富縣山寨攻靖寧州蠻七寨一日夜破
之攻牢撞山寨取仁德府破硝店山寨圍姚安敗賊將
李自久平蒙化州鄧川州破三營復光寨過金沙江攻
北勝府生擒賊將高生平麗江府平偉等州前後斬首
一萬三千餘級生擒二千餘人收精兵人馬數萬船千
餘艘蠻民降者數十萬戶雲南諸路平論公功進爵開
國輔運推誠宣力武臣柱國武定侯賜誥券食祿二千
五百石子孫世世承襲己丑加靖海將軍鎮守遼東丁

邗同大將軍宋國馮公討北敵納克楚降之師旋敵將
追襲公與戰創傷左脇箭復中右脇公洋呼敵傷吾甲
我衆益奮連戰數十合敵遂却已而進征北右副將軍
仍鎮遼東戊辰出討北敵至捕魚兒海邏騎偵敵營不
遠公乃令諸軍少憩飲馬銜枚卷甲倍道直抵敵營北
主覺乃率十餘騎潰圍出其將曼濟太尉來拒我師公
手刃之獲兩營所積金寶珍玩圖書降其衆五萬餘人
生擒敵將約司徒曩嘉及太尉雙寬塔爾呼布達喇

王子等四萬餘人馬駝萬五千匹牛羊輜重無筭師還
賜白金千兩鈔八百錠綵幣四十疋已上以天下無
事且憫諸將老欲保全之厚加賜賚遣歸其鄉公亦就
遣庚午獨名還京上賜坐與語歡甚命統禁兵及在京
諸軍蓋上春秋高知公忠謹特倚重焉辛未以北兵喇
特納實哩寇邊命公討之獲其人口孳畜逐北至鴉寒山
而還丁丑川陝寇發勢張甚上顧曰非卿無能勝其任
者授征西將軍印討之至沔之後河生擒賊首高福興

及黨四十餘人公䟽其同謀者請誅之脅從者乞勿治
且有司不恤民宜正其罪上可之永樂元年癸未二月
十七日卒於家享年六十有九訃聞太宗文皇帝為之
震悼輟朝二日遣官致祭賻恤有加贈營國公謚威襄
賜葬京師聚寶山之原公孝友仁恕恭儉誠實出於天
性母夫人嘗疾篤懸身燈告天求以身代疾遂愈人皆
謂公孝感所致後母夫人卒公廬墓側晝夜號泣不絕
聲卧寢於地毀瘠日甚一夕夢夫人告曰地濕則致疾

致疾則傷生汝固純孝惟竭忠報國為父母光墓不必廬也公感悟而歸家三年之中哀痛如一日平居兄弟怡怡克盡友愛御軍行師動有紀律推心任人甘苦同之其攻克州郡必禁擄掠戒殺降封府庫收簿籍一錢尺帛不敢私嘗北征軍法夜必令親軍更直荷戈環帳立一夕風雪大作公悉罷遣歸營其愛恤軍士多類此家居簡靜好讀書天文地理百家之說靡不通曉教訓子孫以儉素力學為務事太祖高皇帝四十餘年小心

謹慎未嘗有過眷遇雖隆而自處益謙上嘗御便殿賜
坐適有奏事者公趨避之上曰卿第坐朕自理事不汝
關也其見敬愛如此時公卿多置田產公獨不治上問
之對曰臣一布衣荷陛下寵靈叨有封爵子孫衣食餘
饒安敢增益俾生侈心上善之嗟嘆良久公大小百餘
戰金瘡遍體每陰雨痛甚及聞征討之命即日就道未
始以老疾辭其事上竭忠蓋如此曾祖參祖聚父山甫
累贈營國公曾祖妣何氏祖妣趙氏母單氏贈營國夫

人配馬氏封營國夫人公兄弟四人長早卒次興以軍
功封鞏昌侯贈陝國公謚宣武次某福建都指揮使次
即公也子男十二人鎮銘鏞鎰鏐鈇鈇鎗鎗鋼鎗鎮
駙馬都尉尚永嘉公主銘遼王府典寶追封武定侯鏞
中軍都督府右都督闕

鎰中都留守司副留守

鏐散騎舍人鏐早卒鈇贈承德郎尚寶司丞鈇旗守衛
指揮使女九人長適府軍衛指揮僉事蘭瑜次適濟南
衛指揮使戈某次遼王妃次適府軍衛指揮僉事趙斌

次郢王妃次適金吾右衛指揮同知范聚餘早卒孫男
二十有八人玳璧瑋琮瑾珺瑤瑳瑳玳璟玳瑋瑋瑋瓊瓊
琰餘尚幼琮府軍衛指揮僉事玳襲武定侯瑾早卒珺
尚寶司丞瑤梁王府典寶瑳璟皆勲衛孫女十六人長
仁宗昭皇帝貴妃次適留守左衛指揮陳鑑餘在室曾
孫男五人聰晚餘尚幼聰散騎舍人予觀前史稱郭汾
陽功蓋天下而主不疑位極人臣而衆不嫉富貴壽考
終始令節七子八婿諸孫數十人俱膺顯仕唐世榮之

若公勲業之隆子孫之盛方之汾陽夫豈多讓皆由公存心一本於仁故積累之厚愈遠愈隆焉嗚呼偉哉琤以神道之石未立無以昭示永久來請文子閱其家傳考定其大者次第之而系之銘曰天啟皇明淮甸龍飛乘時應運風雲一機太祖受命汎掃餘孽羣力桓桓飛勇就列東西征伐北南以平斷出神聖功協衆能展也郭公有文有武翊輔其主實天畀付鄙陽之戰衆論偉公公仰廟畧不有其功既捷通州再捷太原河南北平

黎庶沾恩南詔之征武功尤大誅叛全生蜀民是賴蠶
彼餘人迭為傾側卷甲擒之兵氛蕩滌皇有嘉錫錫爵
褒功金書鐵券武定啟封錦袍御馬白金文綺赫赫高
門煌煌戟祭世聯國戚代有顯融匪幸所致惟公之忠
忠在朝廷載之信史亦有孝思永錫爾類在昔汾陽著
勲有唐公實以之於今益彰我作銘詩勒公墓道百世
斯承有赫其耀

都督僉事謝公神道碑銘

李景隆

昔我太祖高皇帝受天明命握乾符而起淮甸御寶歷而
而定萬方豪傑貔虎之士應期而出以折衝禦侮而克
戡多難自正大統既論功行賞以報功德之臣至於位
躋五府始終哀榮而垂光史冊者蓋亦可數焉夏四月
六日前軍都督府僉都督事謝公以疾卒禮部以聞擇
葬地於京城桂山之陽以六月九日窆焉按狀公諱彥
字子超姓趙氏世為鳳陽府鳳陽縣於皇里人幼失怙
恃鞠育於外家因以孫為氏故元之季兩淮兵興公募

集義勇圖保鄉井歲辛丑秋七月乃將其兵南渡大江
從太祖皇帝破安慶克江州於時偽漢陳友諒盜名字
置官屬據為國都至是始奔武昌公以功授義兵元帥
癸卯春三月由安豐進攻廬州九月援荆衡歸峽等州
己巳冬十一月取通泰州甲辰春二月徐宿濠泗潁五
州淮安高郵安豐三郡皆入版圖秋九月轉攻湖州冬
十一月圍偽吳張士誠於姑蘇丁未春正月太祖皇帝
即吳王位己巳四年始以丁未偽吳元年從大將軍中山

武寧王破姑蘇俘士誠公又以功陞掌羽林環衛賜以良馬復從征山東克沂莒密州遂入青州走故元平章庫庫特穆爾洪武元年戊申春正月太祖即皇帝位公駐軍東昌進階武畧將軍尋敗故元平章鄂普軍取河南通務等州秋八月中山武寧王奉詔統兵攻北平公與在行故元順帝既遠遁而燕薊永平保定真定中山以次悉平遂乘勝取山西大同太原二年己酉春三月西破潼關故元平章李思齊棄輜重引兵奔鳳翔三月

庚戌公從中山王駐軍陝西列營長安城北平章王武
率其官屬士民迎降夏四月取鳳翔即追降思齊於鞏
昌遂破臨洮延安平涼靜寧莊浪開成六盤等處而秦
屋環三郡亦望風而靡慶陽守將張思道率兵拒戰凡
七閱月而思道敗走公復從中山王還軍臨洮會故元
河南左丞相庫庫特穆爾來襲我軍王率大衆亟與決
戰既敗之於臨洮復敗之於定西橋殪其將校驅殄其
士卒無筭庫庫特穆爾引殘兵北遁四年辛亥夏五月

調公守禦處州陞應天衛指揮僉事進階宣武將軍五年壬子春正月移守朔州從征和林六年癸丑秋八月敗故元兵於朔州之北獲其將知樞密院張寶院使哈喇巴圖參政高其并其所部兵衆九年丙申春三月進軍寧夏敗諾爾巴哈於賀蘭山收其番衆及其駝馬牛羊而還十年丁巳轉廣威將軍二十年丁卯特陞僉前軍都督府事軍賜綵帛萬疋黃金百兩白金百兩及甲第一區臧獲數十輩命公征討雲南廣西龍里諸部二

十二年己巳秋八月還朝賜以誥命授驃騎將軍二十三年庚午奉詔湖廣都司訓練官軍至貴州置新添衛二十五年壬申更給新製之誥九月公赴山西籍民丁為軍置天成東勝二衛二十七年甲戌春三月十二日太祖皇帝御奉天門召公慰撫之眷倚甚特賜犀帶命復其姓為謝氏明日以其季子達入覲即除散騎逾月而選尚汝陽公主拜駙馬都尉有玉帶金帶襲衣鞍馬之賜長子忠復授興武衛指揮同知三十一年戊寅公

得末疾乃致政家食甫二歲而卒享年六十有九顯祖
諱厚菱贈驃騎將軍僉前軍都督府事祖妣張氏贈夫
人顯考諱中善贈驃騎將軍僉前軍都督府事妣許氏
贈夫人妻邵氏贈夫人子男三人忠懷達將軍任世襲
指揮同知順未任達持進榮祿大夫駙馬都尉女三長
適馬旺次在室季適指揮同知戴義長子孫男十人女
十人自昔一代之興必有虎臣碩輔豪傑之材以翊扶
昌運至於功成治定而彛常鐘鼎之銘河山帶礪之誓

俾與國家相為悠久夫豈易得哉若公以篤厚之姿勇
果之藝盡瘁效忠而致位將領斬關陷陣搴旗先登與
夫首馘之獻不可以數計至於鳴劍伊吾之山飲馬捕
魚之海踐霜雪絕餽糧凍餒斃瘞皆身歷之故能簡在
宸衷光承天寵身居宥府子為駙馬克享榮祿以致考
終豈偶然哉先武靖王與公逢興王之運周旋戎旅二
十有餘年予又辱公同朝而與駙馬君忝同戚里及為
是銘雖重於作而義不敢辭銘曰天啟聖明篤生皇祖

奮自側微丕揚神武瓌材傑士聞風景從盡用羣策以
成治功維時謝公勇踰貔虎小大百戰折衝禦侮迺擢
將領迺掌羽林迺僉衛事簡注皇心自東徂西北南萬
里降城破邑惟上所使殫力盡瘁不有其躬克殄大敵
寰宇混同宥府是登品列第二寵錫使蕃恩榮備至光
照後嗣有義彌敦帝女擇配有赫慶門福澤方隆受天
之祉子孫承傳世濟其美賜葬徵吉桂山之陽刻銘茲
石永古流芳

明名臣琬琰錄卷五

欽定四庫全書

明名臣琬琰錄卷六

明 徐紘 撰

蘄國武義康公神道碑銘 有序 宋 濂

皇帝即位之三載混一華夏聲教所被罔間遐邇梯山航海奉贄獻琛上念熊羆之士不二心之臣東征西伐宣力有年方將胙土分茅以定功賞而都督康公薨於陝西上聞之嗟悼不已既勅有司穿土作室以寧體魄

復欲昭其功勳於悠久詔翰林學士臣宋濂稽諸簡牘
所書文於堅石以垂示於億萬載臣濂謹按公諱茂才
字壽卿康其姓也世蘄州人曾祖文廣皇贈中奉大夫
叅知政事護國追封京兆郡公祖懋皇贈資善大夫中
書右丞上護軍追封京兆郡公父壽皇贈榮祿大夫同
知大都督府事柱國追封蘄國公母蕭氏追封蘄國夫
人當元之季四方雲擾未幾蘄州陷公結義旅以捍蔽
為務授以長官俄遷為鎮府同諸將復九江擣蘄水黃

連寨轉蘄州路同知總管府事屯戍和之裕溪太平之
采石使者考其功狀陞淮西宣慰副使同知元帥府事
又陞宣慰使都元帥歲己未六月上帥師渡江將士家
屬尚留於臨濠陣人多效死於是數戰不克後數月常
忠武王遇春遣游邱虛撓之公連日發軍以應王度其
力疲夜設伏兵質明殲其精銳殆盡然猶収合潰散豎
寨於天寧州明年二月上命諸將以襄陽大砲破其寨
公奔行臺便宜陞淮南行省參知政事甫踰月上亦克

金陵又奔京口舟師追及之公度天命有歸乃率所部
餘兵三千解甲來附免冠頓首言前日之戰各為其主
今日屢敗天數也事主於此死生唯命苟得生全尚竭
犬馬之力以圖報効上笑而釋之仍許統所部兵從征
又明年授秦淮翼水軍元帥守禦龍灣取江陰之馬馱
沙八月偽吳張士誠犯我疆境公驅兵逐之獲其樓船
上賜名馬一匹黃金一錠歲戍戍從廖楚公永安攻池
州取趙雙刀之縱陽遷都水營田使兼帳前總制親兵

左都指揮使明年八月攻皖城偽將率樓船出戰公復獲之又明年六月偽漢陳友諒傾國入寇攻陷我姑孰殺戮我吏民將窺我南京上召公謂曰爾不疑我乎公復頓首謝上曰汝既不相疑宜作書遣使偽降友諒為內應招之速來仍給告以虛實使分兵三道以弱其勢友諒果如所言既至諸將同公奮擊大破之縛其士卒二萬有幣帛白金之賜歲辛丑八月上怒友諒來寇率將士親征公領舟師行擊安慶破江州偽都友諒西遁

遂下蘄州興國漢陽公沿流而下克黃梅某家寨十一月取江之瑞昌敗友諒八陣指揮友諒之勢遂衰遷陣前親兵副都指揮使明年九月復隆興又明年攻左君弼於廬州四月友諒圍龍興上親往援公與諸將皆從友諒聞上至亟解圍還七月大戰於彭蠡湖軍聲嘯呼湖水為之立起浮屍蠹蠢動至數十里友諒遂至敗亡又有幣帛之賜十月上親征武昌公從之歲甲辰二月下之友諒之子理銜壁出降三月進金吾侍衛親軍都

護府副都護四月從大將軍徐公達游攻廬州七月下
之八月拔安豐繼取江陵及湖南諸州加賜幣帛明年
二月改神武衛指揮使五月進大都督府副使閏十月
士誠兵犯江陰京口上帥大將軍水陸並進公在行中
及至鎮江士誠兵已遁又明年正月追至巫子門擊取
其衆獲士卒二千公功為多四月擣淮安之馬邏港拔
其水寨復獲士卒與艨艟無筭淮安平七月遂攻湖州
十一月破之進逼姑蘇姑蘇士誠偽都即遣銳卒來迎

闔大戰尹山橋公持戟督戰益力銳卒盡覆乃進圍齊門刀劍林立飛鳥不敢下大將軍命諸將合攻之吳元年九月姑蘇平公取無錫州十月陞同知大都督府事兼太子右率府使進階榮祿大夫洪武元年上以江南之地入版圖乃遣大將軍經畧中原公從齊魯之地復由黃河取汴梁下洛陽駐師陝州規運饋餉造浮橋以渡大軍鎮河中善撫綏遺民為之立石頌德絳解二州則公所招徠蔽遮潼關秦人不敢東向三年復從大將

軍征漢中奉詔還軍中道因疾而薨實八月之三日也
年五十有七上下羣臣議贈公推忠翊運宣力懷遠功
臣光祿大夫湖廣等處行中書省平章政事柱國追封
蘄國公謚曰武義以九月二十一日塋於應天府上元
縣鍾山鄉之幕府山上親臨奠而百司繼之登幄相望
聯絡原野時人以為榮公娶方氏追封蘄國夫人繼室
田氏封蘄國夫人側室朱氏俞氏子男三人公通經史
大義事太夫人以孝聞輕財仗義意氣磊落而尤有志

於事功值元祚將終其才弗克盡施然而真主龍飛於羣雄之中公即能識之卷甲韜戈率衆臣附坦然而不惑可謂上知天命下察人心者矣由是昭被寵眷倚之以心膂用之為爪牙十餘年間屢從征討茂績竒勲著稱當世存則安富尊榮加以爵位薨則䟽封賜謚賁及九泉令名垂於竹帛重祿延於子孫公其可以不朽矣臣瀛謹拜手稽首述辭於碑係之以銘深懼不足以稱上報功之意銘曰於赫大明受命於天如日之升照於

八埏其一於時康公江險之恃大軍西來視如平地其二巨

礮轟雷物莫敢撓何戰弗潰何守弗傾其三天人攸歸勢

何敢抗知機先來率衆內嚮其四皇帝曰嘻有附匪疏予

開誠心遇爾不疑其五爾礪矛鋌爾部士卒助予四方以

寧萬國其六公拜稽首賜死為生誓殫報効如無餘齡其七

孰不為庭率師往討矯如翼如風馳電掃其八東吳西楚

蹴陳駕張身經百戰克豎始亡其九大將北伐同取汴洛

出鎮於蒲恤其孤弱其十蔽遮河潼以義為闕誰敢操戈

睥睨其間

其一十

玄龜負碑以頌遺愛民亦何心思義斯

在

其二十

從伐漢中迢迢西征有命班師中道而薨

其三

帝念將臣血戰之苦將酌其勲錫以茅土

其四

孰不壽

考以樂承平公胡嬰疾隕魄泉扃

其五

帝情憫悼恩命

絡繹穿山為堂畢茲窀穸

其六

名垂於史祿延於家翩

然而逝公復何嗟

其七

史臣造文大書深刻以昭公勲

有永無極

其八

縉雲伯胡公神道碑銘

宋

濂

上天既革元命皇帝定鼎金陵遣大將下浙東諸郡而
婺衢處三州相繼平時當草昧之初上思得智勇之才
用之於是處之胡公仲淵躍然而起以自赴功名之會
入陪廟筭出鎮鄉邦言聽計從寵遇無比浙東之俊彥
攀龍鱗而附鳳翼者皆自公始若公者可謂卓犖不羣
之士矣公諱深仲淵其字也係出漢安定宋初有諱棟
者自潤之丹陽遷處之龍泉因家焉棟生璠璠生文虎
文虎生竦竦生晟晟生滂滂生衢州錄事參軍松年松

年生鄉貢進士應辰應辰生温州樂清令琇琇生江南西路兵馬都監見大則公之曾大父也大父諱堂父諱鈺仕元為征東行中書省左右司員外郎母趙氏生子公其長也員外府君蚤歲宦遊京師公始十齡而大母李夫人與母夫人相繼亡公侍大父奉繼母撫幼弟艱難刻厲以自植立未弱冠走京師侍府君適府君使高麗復往候馬居久之府君棄捐館舍公崎嶇萬里奉柩南還舟行一日泊大厓下夜夢人語之曰此厓且崩

宜急避驚覺趣移舟俄傾大雨至厓果崩聲如萬雷既
歸葬於縣北之圍原遂廬於墓左悉取諸子百氏天官
地志兵謀術數醫藥卜筮老釋之書而研窮之發為文
辭操筆可立就當元之季江淮俶擾蔓延閩浙間盜由
建之浦城松溪入龍泉公嘆曰制水東地氣白矣禍將
及乃集鄉兵結寨於湖山已而處州之民相挺為盜江
浙行中書省調萬戶舒穆魯公宜孫戍處州辟公參謀軍
事檄所隸諸縣募壯士為軍浹日間得數千引之屯竹

口下令賊中曰爾皆良民也因驅迫故為亂棄仗即仍
良民耳賊以公長者其言不欺盡毀旗械肉袒請降溫
州戍卒韓虎陳安國殺主帥據城叛行省命宣慰使恩
寧普公討之道由處州與公語意合帥府軍事復辟公
叅謀之公曰溫城叛者唯一二人耳若破其城玉石必
俱焚如平民何遣辨士入城說其黨曰韓虎等悖逆亂
常今王師四集旦夕且攻城雖金湯無不破者若輩胡
為與賊守自取作虜粉耶將軍未忍即加兵苟能去逆

效順悉從原有或稔惡不悅城一破悔無及已其黨相
向泣曰吾屬自度旦暮鬼耳儻獲復至敢不唯命乃殺
韓虎等以城降溫城瀕海民以魚為業時城閉者三月
民病甚公請發粟賑之驩呼之聲載於道路宣慰欲列
公功於朝公辭既而宣慰以行省參政總兵征鄱陽復
邀公俱行戍無鉅細悉屬之青田潘惟賢聚衆為叛龍
泉長吏聞風遁去賊遂焚縣治公之師曰王毅先生與
門弟子集義兵擣退而里中惡少年疾其功因害先生

公在鄱陽馳而歸執害先生者盡殲之縉雲之黃邨松陽之白岩遂昌之大社麗水之浮雲泉溪無賴之氓咸為盜根勢蟠結不可禦行省丞相喀喇公承制以舒穆魯公為行樞密院判官分院鎮處州既至假公分院行軍都士統兵討麗水攻泉溪賊寨拔之未幾又平浮雲白巖賊懼遂乘降縉雲盜亦就平乃移師攻遂昌賊首周天覺方友元傾其精銳出迎敵公望見笑曰賊若堅守不出未易即殄滅今茲之來豈非天授我乎分部諸校

以正陣接戰以奇兵夾擊之別遣游軍入山搜其伏匿
比戰賊三面受擊輒大敗斬首數千級生擒八百人獲
方友元象之乘勝直攻大社周天覺降復移兵討青田
賊黨金德安殺潘惟賢兄弟以降先是國兵取浙東婺
衢既下獨處州為舒穆魯公所守不降歲己亥今上皇帝
遣僉樞密院事胡公大海由間道取處州舒穆魯公出戰
敗北大軍入城而分兵取屬邑未附者公時以假元帥
統龍泉慶元松陽遂昌四縣兵故閉關為拒守計四縣

士民咸請於公願內附以全民命且曰君治兵殆十年
勤勞至矣而朝廷無一命之錫國家負君君何負於國
哉公知時事已去乃解甲出見胡公四縣因不受兵上
素聞公名召至南京待以殊禮居無何擢中書左司員
外郎上日與公論天下事公有言未嘗不稱善也遂詔
公還處州招集舊所部將校兵卒以從征西上既平江
西命公以親軍指揮守吉浙東苗軍為變婺守將既被
害而處城亦為所據上遣公復處州比至城已復除公

浙東行省左右司郎中總制處州軍民事郭郭甫被兵
民物凋瘵而山寇乘間竊發人情未固公隨方招捕凡
首惡者即誅之然猶慮戍兵之寡日募之獲勝卒萬餘
人諭於衆口兵少不足禦敵師衆又無以食之奈何衆
皆曰養兵所以衛民苟不為禦備計子女玉帛且不保
况於食乎公迺因民之產以權宜增賦之沿海軍素驕
橫及是以復城有功橫益甚公擇其尤無良者斬之衆
乃驚服江西食東浙鹽而有司十分稅一販者鮮至公

請以二十分收一商賈遂通城南枕大溪浮橋之廢已久橋隄當水之衝亦為所齧蝕幾盡公即上流比舟為梁以濟行者州學敝壞講舍僅存用以貯官粟公撤而新之薦新進士吳世昌為郡文學以司教事城中民廬多為戎士所據混淆而處公度閒曠之地建營屋數十區使別居之縉雲官田其稅額甚重執役者恒私以粟代賞公以新役入之田實其數其害乃除諸暨守將謝再興叛兵犯東陽平章李文忠擊走之公引兵為援

建議以為諸暨浙東藩障若諸暨不守則衢處不支矣
乃度地去諸暨六十里並五指巖新築一城不旬日而
成樓櫓濠柵靡不畢備上聞諸暨叛遣使來議別為城
守計暨至城已完上嘆賞不已其後浙西將李伯貞大
舉入寇兵號二十萬至城下城堅不可攻敗績而去上
念公立城功以名馬賜之青田之廬茨地接閩徼人素
獷悍葉仲賢恃其險屢叛乘我師在外復來寇公怒還
軍深入擒其渠魁少壯者皆籍為兵二十年逋誅之盜

一旦就平溫州方明善攻我平陽公出偏師復之并復瑞安所侵地而親統正軍攻溫州明善勢感與其仲父國璽議納歲幣詔公還師明善繼以鹽若干來進貢上命處州易銀以入內藏上怒銀色惡責守令使償公曰此吾過也守令祿薄何能償乃售龍泉田以銀九百兩代輸公尋入覲上欲晉公且柄用之以邊事未輯願還守外上時已即王位乃擢王府參軍仍總制處州等翼陞辭上諭之曰俟閩浙盡平當還汝中書矣福建陳有

定擾邊公奉命征之遂取建之浦城而崇安建陽二縣亦下上賜以所乘駿馬建之守將阮德柔兵四萬屯錄江實出我師後公還兵擊之破其寨柵有定大慙帥銳卒亟圍我營公突陳與決戰馬蹶因被執有定既得公頗禮遇之公具道天子仁聖四海歸心羣雄樂為之用且援竇融歸漢事撼之有定初無殺公意會元使至督迫之遂遇害於福州實歲己巳之春也享年五十有三上痛悼不已命使者即其家祭之復詔中書議加卹典

追封縉雲郡伯有爵而無階官職勲者有司之制未備也公天資穎拔智識絕倫藝術弗學弗已學之則無不精性倜儻好施予賢士有貧乏傾橐以周之弗吝也其守鄉郡凡五載馭衆一以寬厚用兵十餘年未嘗妄戮一人恩惠在人甚多故其歿也聞者莫不流涕鄉人為立祠宇祀之公元配同鄉項氏二子長曰楨宣武將軍僉處州衛指揮使司事次曰樞繼室滁陽楊氏公既歿之二年楨等乃刻木為象具衣冠以葬實祔於園源之

左莖已來徵濂為之文昔濂侍上於白虎殿忽顧問曰
胡深何如人濂對曰文武才也上曰誠如卿言浙東一
陣朕方賴之則上所以倚公者至矣然公亦知宸眷之
深而無以圖報嘗謂人曰區區承詔鎮處城皇靈覆冒
幸已寧謐誓將挈全閩之地以圖展犬馬之微衷奈何
功業未就而死及之其非命也夫濂辱交公者五六春
秋見公酒酣耳熱指揮三軍而雄姿奮揚不可遏及與
縉紳之流論文評詩則歛然布衣書生也濂未嘗不服

其勇而愛其謙今公不可作矣敢用備著公之事揭諸墓門以告世之知公者銘曰泚泚胡公萬人之英一劍橫空莫之敢撓浙河之東地氣盡白此為兵徵見於龜莢爾衆荷戈來入我堡寘爾枕席拔爾水火公師如風鼠寇如雲一鼓之餘散為埃塵節鉞出鎮涉歷三年將鼓不驚雞犬晏然雖登叛人陷我諸暨公遷其城寇至輒敗皇用嘉錫使車絡繹天閑龍馬於公弗惜公感主知酣歌慨慷誓提入閩以歸職方旄纛所屆勢如破竹

天未厭亂三軍夜哭公材孔多公志弗阿月出如赭公
命奈何丈夫之澤流於異方孰能行之父母之邦匿公
之臨十里枯骹公雖止斯庶亦無愧廟堂有嚴肖像其
中精靈翕然上與天通括蒼之山其翠欲滴公名配之
有永無斁

御史中丞章公神道碑銘

宋 濂

嗚呼是為吾友龍泉章公之墓初予未識公時輒稔聞
其名及公應聘而起同赴於南京同館於青溪同出入

禁署以備顧問如是者四三年私竊以為生我者父母
知我之志者唯公而已不知公何為棄予而遽死矣乎
有善孰予相孰知我瑕疵而攻之乎神道之碑公之子
特以為屬肝腸百裂其何能綴緝言辭乎相知之深者
不為之則鋪張君子之休美不識當屬之誰乎因泣淚
而叙之曰公諱溢字三益姓章氏處之龍泉人遠祖有
曰巖者仕宋以兵部尚書守泉州始家於南安至唐康
州刺史及又自南安遷建之浦城及生福州軍事判官

脩脩生光祿大夫檢校太傅西北面行營招討制置等
使持節高州諸軍事高州刺史仔鈞娶練氏生子十五
人其第三子獻誠仕南唐為銀青光祿大夫檢校司徒
獻誠生文錫仕宋為秘書省校書郎文錫生都官郎中
重又自浦城遷於龍泉子孫遂為龍泉人重生吉吉生
順順生公琛公琛生世安世安生舉舉生宗宗生鄉貢
進士輔輔生文義文義生用之用之生強宗強宗生煥
文則公之高祖也曾祖諱斯立祖諱格父諱遇孫母某

氏公之始生其音如鐘父母疑為不祥幾棄不舉及成童嶷然莊重不習鄉井輕儇態諸兄出應科繇頗為儕類所侵苦公忿曰彼徒謂我弱爾吾不自厲豈為男子耶乃往受事縣官即有曲者舉正理直之衆始愧服比弱冠從鄉先生王叔剛遊從事於正心修身之學既又聞金華為文獻之邦閒出遊以次叩其統緒浙東憲使圖卜沁布哈請與語悅之已而改官陝西要公俱至虎林心忽驚悸力辭而歸抵家父病已革越八日而逝人以

為純孝所感至正壬辰蘄黃妖寇自閩犯龍泉公與從
子存仁避亂山中而存仁為寇所執公心計曰吾兄止
有一息不可使無後挺身出謂賊曰兒幼無所用我願代
之賊聞公名方出重購以求及得公大喜知賊帥欲問
計公正色拒之曰若等皆有父母妻子顧為此滅族事
耶賊怒繫之柱以刀磨其脅曰不降者且死公曰貪生
惡死固人常情然吾終不為不義屈賊愈益怒曰汝誠
不畏死耶公曰死即死何畏乎賊壯之不敢加害公夜

紿守者乘間脫歸乃集里民為兵不旬日擊却之處州
府判官以兵來龍泉欲盡誅平民註誤者舒穆魯將軍宜
孫實總兵政公走麾下說曰將軍知賊之由乎曰不知
也公曰貧民迫於凍餒故相挺而從盜誠得一循吏招
輯之民即貧民耳今不出此而肆行剪屠是殆揚湯而
止沸也不識可乎舒穆魯將軍曰善徵先生言事幾敗即
檄判官毋擅殺舒穆魯將軍服公器識留幕下與議軍事
其平屬縣慶元及建寧之浦城松溪羣盜公有力焉上

其功江浙行省丞相喀喇公承制授公將仕郎龍泉主簿辭不受海寇起黃巖掠沿海郡縣行省命舒穆魯將軍守臺城臺之寧海民亦變攻圍臺城急舒穆魯將軍飛檄召公為援公方退居田里得將軍檄即起曰吾邦非舒穆魯將軍人且盡為枯骨今一旦有急政我報德之秋也集趨勇少年數百人晝夜行至城下約內外夾擊賊遂潰海寇亦遁去寧海大饑豪氏吳甲蔣乙積粟不糶公言於舒穆魯將軍將軍因屬公行縣賑之公至縣即抵二

豪罪發其粟賑饑夫其尤困者俚僧作糜食之公還龍泉龍泉亦歲儉大家有粟高其直且不發公先以私田易粟貸里人乃行勸分之政民受其惠為多鄰邑青田潘惟賢為盜而龍泉監縣保赫貪虐無狀民因導潘攻縣治保赫鼎棄印走公同其師王叔剛名豪傑與賊戰敗走之縣治遂復行省給銀幣為賞保赫鼎懼棄職獲罪而愧公有功乃謀害公公方贊元帥和迪爾開府處城未敢發會帥府問保赫鼎罪遂結季溪惡少拒命

首害叔剛於家帥府檄兵擊之保赫鼎遁去於是處之
七縣盜皆蠶起行省移舒穆魯將軍以行密樞院判官分
治處州公謂舒穆魯將軍曰松陽小醜不速平將養成大
患耶將軍曰唯君處之公乃遣千戶曹勝安督兵授以
方畧一戰盡降之分院上其功行省陞承事郎松陽縣
尹又辭不受元帥葉君環攻鄭寇於麗水屢為所敗分
院調公及密樞院都事胡君深合討之公與胡君統軍
至浮雲賊衆來逆戰並山為長陣兵既接我軍張左右

翼夾攻之賊大敗直擣其巢穴賊望見公來拜乞曰我非為寇者待我殲此海蠻即降矣海蠻謂葉君所部海軍也公曰吾不知他特捕反者爾為內外二砦公麾兵踰外砦立壁或疑壁於兩砦間非利公曰非爾輩所知我既踰外砦則內砦疑其已降而外砦亦計其疑已二砦相疑賊破必矣壁未完賊突至相持未有勝負公麾其奇兵橫擊賊奔北即移兵圍內砦數重下令急攻遂陷之執鄭寘諸法外砦亦降行省復授福建行省檢校

官尋又改除奉訓大夫處州路總管府判官皆不受南
行臺治書侍御史沁摩喇實分臺於婺長鎗軍判迫其
城治書遣從事楊迪徵師於公公勒所部軍就道長鎗
聞公至輒引去省憲交章薦於朝除武德將軍僉浙東
都元帥府事又辭不受或疑為要名公曰吾所將皆鄉
里子弟使其肝腦塗地而吾獨取功名弗忍為也青田
賊吳英掠婺之金華永康東陽諸縣聚衆猖獗公議討
分院乃調兵屬公及胡君與戰屢戰皆敗之賊勢沮縛

其黨張貴李興甫等出降遂昌凶右戶閉糶土豪周天覺嘯聚殺之元帥胡君往討天覺負固不服久之始請降公曰此賊不殄必貽後患胡君不聽受其降已而天覺果以復叛誅始天覺之未降也嘗執其黨與三百人繫諸獄至是胡君欲盡坑之公執不可得生全者十六七時天下日入於亂公結廬匡山上自號匡山居士屬其子曰兵將至矣汝曹其保障州里乎己亥王師克處州公又避地入閩中今上皇帝遣使以束帛召公公乃

幡然而起與青田劉君基麗水葉君琛金華宋濂同名
至建業入見上問勞曰我為天下屈四先生耳然四海
紛紛何時定乎對曰天道無常唯德是輔惟不嗜殺人
者能一之耳上曰卿等其留輔予矣亡何擢僉營田司
事巡行江東兩淮之境田荒蕪及耕墾者皆分籍之差
稅賴之以便公以疾在身者久上時遣使存問及疾少
愈即入謁上見其來喜曰疾其瘳乎何遽出也一日上
忽念公詢於中書左司都事張來碩曰章溢日來康強

否來碩對曰溢日夜念母不置而以主上遇之厚不敢以言鬱鬱成疾耳上即命公歸省賜以白金文綺而留其季子存厚於京師浙東始設提刑按察司即擢公僉其事尋命還處州代總制胡君入朝而為存厚娶胡君女賜賚優渥且俾存厚入侍皇太子以示親信胡君出師温州復詔公還守處州饋餉供億規措無缺而民不知勞及師旋即日以總制事付胡君而還其部王師平荆楚設湖廣提刑按察司遷公僉事司公入見上慰勞

之曰紀綱之事今屬卿矣公既至覩荆襄多廢地遂建議分兵屯田且以控制北方計為便上曰所言甚善第未暇耳湖廣行省鎮撫回回怙勢作威輕重人罪以為常公廉得狀坐以法曾未幾河內道按察使宋思顏以浙東憲使事不白下獄而浙東按察使孔克仁僉事王壽亦以事被逮辭或連公公憂懼不知所為上遣大令史劉君基喻公曰予素知章濫守法令毋疑也既而胡君以兵入閩陷沒處之境皆動搖上命陞公浙東按察

司副使往鎮之平陽瑞安浦城福寧軍民等事皆隸焉
公辭曰臣前任浙東無狀同列皆獲罪而臣獨蒙寬宥
今若加陞擢則益重臣過疆場之事臣身任之萬死且
弗避副使之命臣不敢拜上重違其志命仍僉浙東按
察司事比至山寨或已叛公宣布詔旨軍民皆感動乃
誅其首叛者餘皆帖然青田夏清聞胡君敗與福建參
政范昌大合寇慶元龍泉時官兵盡戍浦城中僅足
自守公召舊兵義兵使據要害列木柵為屯勢相聯絡

別命元帥祁興季汝即龍泉縣治亦環植木城賊聞不敢犯公長子存道初以元帥戍浦城及是有旨命存道提兵為遊擊而公即處城坐鎮之公謂父子相統於律不宜乃上奏請罷存道官不允兵戍浦城者以食不繼為病上以屬公洎浙東行省右丞李公文忠李公欲運處州糧餉公以為舟車不通而軍中所掠糧甚殷請拘入官而均給之兵食乃足青田稅官金甲發其同僚白乙匿官課乙既誅死而甲恣為奸利公訊之甲善口給

辨不置公曰汝罪狀已明奈何欲以口舌撓法乎其辭
遂屈上知為公所鞠當不寃命斬之建寧守將阮德柔
遣使來納款人咸以為詐公曰陳友定據全閩勢必不
能容故德柔為圖自全計非詐也以其事聞詔許德柔
以元官守本郡命比下德柔果為友定所并公因留其
使厚存卹之温州茗洋周遂卿恃山險常為寇鄰邑皆
患之而郵傳之通平陽瑞安者亦為所要遮公命存道
合平瑞總督孫安之兵擒斬遂卿中書命處州造海舟

若干艘并僉溪船戶為水軍其戶凡一千既有領之者而又隸於軍府役繁而事擾公上奏設水軍千戶所專統之處多山而少田軍需恒不足胡君為奏免唯輸硫黃白藤於朝而行省復有所科公屢以為言罷之水軍千戶任惟淵朱仲欽共戍青田會寇至仲欽逆戰而惟淵走還仲欽以無援故敗公斬惟淵以徇遣指揮何世明擊寇走之惟淵乃胡君所任信者既伏誅却曲莫不股栗浙江行省叅政朱亮祖總兵取温州公調何世明

以軍從溫州平公聞其掠人子女命鎮撫林理徵之各
却送還其家海隅既寧公請朝京師上報曰吾知卿在
邊良苦俟平吳當即召卿爾及浙西諸郡皆平上遣使
召公且命分兵征入閩而存道守處州公既入見上嘉
獎甚至上諭羣臣曰章溢雖儒臣父子宣力一方寇盜
盡平其功誠不在諸將後公再拜謝不敢當明日上召
問閩諸將何如公對曰御史大夫湯和由海道進平章
政事胡廷瑞自江西入此固必勝然閩中尤服浙江平

章李文忠之威信若令文忠帥師從浦城取建寧此萬全計也即日召文忠出師如公策處州之糧其舊額一萬三千石有畸後以軍興加征至十倍民不堪命公言之丞相丞相入奏上曰吾勞處民久矣詔從其舊温州黃宗雲朱君達來附各授以元帥之職還守其土及我師征溫失利輒叛去溫既平君達又請降公曰何物小醜叛而復降納之是無法矣奏戮之浙江行省承詔作大舟入海徵輸巨材檄處州與諸府同公曰處婺之交

限以峻險縱有木道何從出且凋敝之民曷以勝此公
力言於省臣止之洪武元年正月上即皇帝位有事於
太廟公與執事畢越翌日召公及劉君基入見上御奉
天殿羣臣咸在上歷陳其功並拜御史中丞公辭不允
尋兼太子贊善大夫公務存大體不屑屑於細故或以
為言公曰憲臺百司之儀表居其職者當先養人以廉
恥使人避而不犯豈直待搏擊為能哉上親祀社稷會
大風雨還坐外朝怒儀曹議禮不合以致天變將殺之

公奏曰風雨已連朝無足怪者縱禮官議有未盡陛下之誠自足以格神明願寬雷霆之怒上為之霽威上愛公甚嘗語公及劉君曰二先生年向老恐感霜露致疾善自衛攝不宜早趨朝也存道部鄉兵萬五千從李公入閩閩平詔存道以兵從海道北征公持不可曰鄉兵農人耳始命征閩許以事平歸農今復調之是爽信也上不憚而罷公繼論奏曰兵已入閩者俾還州里昔嘗叛逆之民宜籍為軍使北征一舉而恩威著矣上喜曰

孰謂儒者果迂闊哉非先生為朕一行無能成茲者事
公受詔遂行比至處州母夫人已歿公馳還舍援例乞
丁憂詔不允丞相李諱公復貼書道上眷倚之意而遣
存厚還家公灑泣而出日治戎事惟謹鄉兵既集命存
道部領由永嘉浮海北行上章乞如律守制詔仍不允
已而章再上上覽之為惻然曰吾固知其情不可奪矣
但朕憲臺缺人耳遂可其奏存道至崑山走京師聽進
止上諭之曰汝父事朕則予汝嘉因授以處州衛指揮

副使戍於上黨尋移平陽公自喪母夫人悲戚過度居常忽忽若無以自存者及營宅兆親負土石而感疾益深子女見之皆相顧悽愴曰勿憂也吾父母幸以安厝祖宗邱墓幸粗整飾歲時薦饗幸有條序吾庶幾無憾第荷國厚恩未能報効此為慊耳臨終親友何璿來候曰當收斂此心母有所執滯公曰吾久矣知之遂薨於龍淵之私第實洪武二年夏某月某日也享年五十有六訃聞上甚憫悼乃親撰文遣官即其家祭之以某年

某月某日塋於某山之原公娶陳氏勤儉恭淑克盡內
助子男三人長即存道明威將軍處州衛指揮副使次
存誠次存厚孫子男四人集慶集恭集善集正公性篤
於孝友父喪未塋而盜發里閭室廬被焚公稽顙籲天
火至柩所而滅事母夫人備極孝養每事必得其懽心
與二兄別居已久既創第龍淵請二兄同居以奉母怡
怡之情藹如也先世有墓祠曰標慶菴公起其廢一新
之且益田供祀事而定祭享條序命子孫世守之其於

宗族里黨患其子弟無所拜業則創龍淵義塾延碩師以教之患其死者無所於塋則以玉峯西岡為義阡聽其藿瘞焉又以王叔剛實鄉郡之賢者而舒穆魯將軍能忠於所事即龍泉劔水之陽設祠宇祀之曰忠賢祠盖凡可以聳善扶義者無不為也公狀貌宏偉器局夷曠而撫世酬物一本於誠一循乎禮義外若和緩而其臨大事則議論爭辨不避權勢必折衷於理而後已其與學士大夫談聖賢之道如味飴蜜丸篤尚伊洛之學嘗

曰古人為學皆躬行實踐人倫日用之間無非學也今人以記誦詞章為務特學之末事耳故公於章句之習皆不以屑意而於綱常之大端有關於世教者恒切切為人言之生平務在濟人利物嘉言善行人皆能道之不可勝紀余竊聞之章為東南著姓自五季以迄于宋代多顯者內則兩制八座外則州牧邑宰皆未嘗缺人至親提師旅捍衛鄉州能成其勲名唯太傅公為尤盛聞人至今道之公當元季紛擾羣盜四起磨牙吮血而

桑梓為墟公談笑而起皆剝殄之無遺育處之民至今
思之於是聲光流顯上致萬乘之知持節諸部執法中
臺其功業視太傅公疑若過之此無他大傅之所遭者
衰也公之所際遇者有道維新之朝也古人所謂能光
前人者公其有焉予敢評隲公行勒諸堅珉以垂示永
久於戲金可銷也石或可泐也公之功不可忘也銘曰
五季之亂殺氣昏太傅雙手障南閩西巖結壘兵雲屯
羣衆偷竊方續紛怒來欲以一氣吞陰功上聞帝為欣

勃生蟄蟄千子孫白缺

牀如爛銀匡山繼之譽益振

方顛踈髯目電焯缺

鴻鬯鐘在軒蚩蚩赤子扇妖氛

額抹絳帕手握襪嘯呼不異鬼魁羣公起長驅汗且奔

一障伉立無邊塵較之太傅功或殷重徽疊照絕等倫

大明天子御紫宸濟濟萬國咸來賓東帛往聘東海濱

加以祿爵恩寵新庸田使者勞徠勤繡衣行部照青春

貪夫宵遁不待晨一朝南徼將星湮括山恍惚失嶙峋

狐狸跳舞騁妖神帝曰汝溢汝老臣整汝戎旆旋汝輶

公車戾止集吏民導宣威德語復諄有叛命者馘以徇
坐鎮鄉城如虎蹲大兒游擊左右巡四郊帖帖多柔馴
召還執法居諫垣長跪敷奏嬰逆鱗堂堂風慘驚逝魂
上表陳情達帝聞哀號負土自築墳因劬致疾亟返真
聞之誰不淚沾巾公知學術歸一原時料瀟洛溉本根
所以不到枝葉繁文事武備道乃存黃腸題奏藏山礬
大書遺行勒堅珉傳千百載期無諼

明名臣琬琰錄卷六